

15. maj 2012

Illeerisaasiat § 37 imm. 1 naapertorlugu Naalakkersuisunut ima apeqqtunik saqqummiussivunga:

**Naalakkersuisunut apeqqt:**

**Qeqertat nukissiorfeeraqalernissaa imeqalernissaalu anguniarlugu Naalakkersuisut qanoq eqqarsaatersuuteqarpat?**

(Inatsisartuni ilaasortaq Doris Jakobsen, Siumut)

**Tunnngavilersuut:**

Qinikkatut Avanersuarmi angalaninni, tikitama ilagivaat Qeqertat. Ilisimaneqartutut Qeqertat kallorip inneqaranilu imeqanngilaq, naak inoqarfiujuaraluartoq.

Qeqertat eqqaat tassaavoq angisuunik qaleraleqarfissuaq, piumassuseqaraanni aalisarnikkut tunitsiveqarnikkullu inerisarneqarsinnaalluartoq.

Ukiuni kingullerni Qeqertani najungaartut nunaqarfimminni inerisaarusullutik Namminersorlutik Oqartussanut qinikkanullu saaffiginnittarsimagaluarput annerusumillu ulloq manna tikillugu kinguneqanngitsumik.

Qeqertani najungaartut namminneq nassuiaanerat malillugu, fabrikkiornissaq siunnersuutigineqartarsimagaluarpoq tamannali ajornartinneqarpoq kallorip inneqannginnera tunnngavigalugu, naatsumik oqaatigalugu ineriartortitsinissamat takorluukkat Namminersorlutik Oqartussanit itigartitsissutigineqartarput atortorissaarutunik pisariaqartinneqartunik amingaateqarnera tunnngavigalugu.

Qeqertani innuttaasunik ataatsimiisitsininni aamma eqqaaneqarpoq, kujataani kallorip inniliuat atorunnaartoq Qeqertarmiunut akeqanngitsumik tunniunneqarsimasoq, nassiunnissaanullu akissaq Qeqertarmiunut ajornartorsiutaammat Naalakkersuisunut tapiiffigineqarnissamik saaffiginnittoqarsimagaluartoq. Taamaattorli qinnuteqaat Naalakkersuisunik itigartitsissutigineqarsimasoq. Erseqqissaatigeqqissavarali tamakkua ataatsimiisitsinermi tusakkakka innuttaasut namminneq saqqummiussarimmatigit.

Ulloq 9. maj 2012 Aalisarnermut Piniarnermullu Naalakkersuisoq Inatsisartuni ataatsimiittarfimmi apeqqarissaarneqarmat apeqquteqaatingaara, Naalakkersuisut Avanersuarmi aalisarnikkut piniarnikkullu ineriartortitsinissamat qanoq pilersaaruteqarnersut. Naalakkersuisoq akivoq: Qeqertat naalakkersuinikkut sivisuumik oqallisaasoq, imiliisoqarsinnaanera kallorip inniliisoqarsinnaanera aamma eqqartorneqartartoq soorlu Moriusami atortut Qeqertanut nuunneqarnerisigut.

Taamaammat Naalakkersuisunut makkua apeqquteqaatigissuakka:

- Moriusami atortut suut pineqarnersut?
- Qeqertani imeqalernissaq aammalu kallorip inneqalernissaq siunertaralugu Naalakkersuisut iliuuseqalersaarnersut?
- Atortullu pisariaqartinneqartut Moriusamiik Qeqertanut nuunneqassappata, qanoq tamanna aningaasatigut naleqassanersoq?
- Kujataaniit nukissiorfeeqqap Qeqertanut nassiunnissaanut tapiiffigineqarnissamat itigartitsinermi suna tunnngaviusimanersoq?
- Aammalu kujataaniit nukissiorfeeqqap Qeqertanut nassiunneqarnissaa qanoq naleqarnersoq?

Taamatut Naalakkersuisunut apeqquteqaateqarlunga neriutigivara, apeqquteqaatikka akineqarumaartut.